

## Jü Carta San Pablota Jiojtekähui Jume Efesiommehui

### *Teboteri*

<sup>1</sup> Ínapone Pablo, Jesucristota apóstol Diosta ínel éä pámani, jume tuísi Dios huáateka entok Cristopo santosi emo jípuremmehui, pueblo Efesopo jóakammehui.

<sup>2</sup> Diosta tühua entok yánti jíapsihuame enchimmaktunake, itom Dios Áchay bétana, entok Señor Jesucristota bétana.

### *Espíritupo tühua Cristota yore mákähui*

<sup>3</sup> ¡Tepa úttílsi maachi jü Dios, itom Señor Jesucristota Átchay! Síme jü tühuy itom tápuniak téhuekau ayukamtayi. Áman áamak itom ané bénasi itom ä mákkak, juka tühuata, Cristota huämi.

<sup>4</sup> Entok tü éehuäpo Dios itom yeu púhuak, kee íkái ániata yáahuayo, ínëli itom santomtunake tíaka entok báksiataka ímí itom annakë béchïbo, Áapörík béchïbo.

<sup>5</sup> Yore nákhüäpo itom yeu púhuak, ä üusimpo itom nüka, Jesucristota huämi, Áapörík tü éäpo entok ínel ä huáatiäpo,

<sup>6</sup> ä úttíluäpo juka símek béppa ujyori Áa béchïbo tü éehuäpo. Huámakíri Áapo itom mabetak, ä Üusi úttesi nákhuanamamak náuhui.

<sup>7</sup> Ä ójbo béchibote béja jínëutaka aane, jume itom Dios bejrim béja tuchari, yúmalasi ä tü éábeyi.

<sup>8</sup> Ito béchibo ä büruriak, juka át jünee huaka jita täyahuamta.

<sup>9</sup> Itom ä täyatuak, ä éäpo éсотaka bénasi maachik, ä huáatiä pámani. Áapo béja júkai yáa báreka éiyay, ä türë pámani.

<sup>10</sup> Iri jita yáanäu béja ínel huéiye, tiempota yúmayo, Cristota simeta náu tóijhuäpo nésaunakë béchibo, juka ínëli téhuekapo ayukamta entok ími buíapo.

<sup>11</sup> Dios Áapo ínel ä jünaktelatukay, Cristota huam ámani, juka Diosta áttiari itom ä áttianakë béchibo. Dios Áapo jíba jümü huam ä yáa báreka éiyay, bínhua naateka.

<sup>12</sup> Inélite Áa béchibo, ítapo jume bát Cristotat boobíchaihuime, hua símek béppa ujjoría Áa béchibotunake, ä úttilhuäpo.

<sup>13</sup> Huanäi eme éntok Áapörík bétana juka lutüría nokta jíkkajaka, juka evangeliota Dios bejrimmet enchim jínëumta bétana huémта, éntokem ínëli Áapörík súsualeka, Espiritu Santopem Diosta áttiapo tatahua juka Áapörík itom mák rókaka nokakábeyi.

<sup>14</sup> Espiritu Santotate bát mák-ri, teboterita bénasi, júnaköri áman simeta itom mákhuäu núkisi. Huanäi béja jü Diosta úttilhuame Áapörík béchibotunake jíbba.

*Jü Espiritupo jita täyahuame entok machisi yore ä bíttuahuame*

15 Huäri béchïbo ínapo, juka Señor Jesucristota enchim súalë bétana nokta jíkkajaka, entok síme jume Señorta súaleme enchim náké bétana,

16 jíbane Diosta baysauhue enchim béchïbo, enchimmeu huáateka Diostau buanaka.

17 Jü itom Señor Jesucristota Dios, jü símek béppa ujjóriapo Áchayhuari, espírituta át jünee huamta entok yeu machiriata enchim máknake, Áapörík bétana jita täyahuäpo.

18 Áapo enchim jíápsipo machiriata ayutuanake, enchim ä jünerianakë béchïbo, juka Diosta bétana boobit-huamta jíatukähui, entok jatchiaka itom ä boobichähui, juka téhuekau ayukamta jume santom áttianakëhui,

19 entok jáchin juka Diosta úttiära kaa lü-lüteka juebenaakähui. İri úttiäray itom ania itom ä súale pámani; huäri béchïbo úttiärata jípure ä buere úttiärayi.

20 Entok huäri úttiäray két Cristota kókkolam násuk jíabitetuak; huanäi ä bátam bétana ä yétchak, áman lóoria téhuekat jikachi.

21 Síme úttiära entok yäura jábe nésahueka aneme ják ayukamta béppa ä yétchak, entok síme téhuam téttehuaahuame béppa, entok kaa ímï ániat béppa jíbba, të hua ánia äbo huémtat béppa junne.

22 Entok síme ayukamta ä guókim bétuk ä tójjak, entok igleesiatau kóba yöpo ä kétchak.

23 Jume Cristota sualhuäpo nau anim béjam Cristota takahua; huäri béchïbo jume Cristota sualhuäpo nau anim Cristotay tápuni. Síme ímï

ayukame éntok Áapörík béchibotaka ímï  
aayuk; Áapo éntok símekuu huéiye.

## 2

### *Ä súalhuaka béchibo yore jineihuame*

<sup>1</sup> Huanäi Áapo jíapsita enchim mákkak, jum  
kaa türiku enchim kókkolatuko.

<sup>2</sup> Inëlem rejtey, símeta juka kaa türík ímï  
ániapo johuamta joaka, huaka ímï jeka ániapo  
nésahuemta éäpo jíba jíapsaka. Huári espíritu  
én ámet naa huéiye, jume Diosta nésahui kaa  
jo báaremmechi.

<sup>3</sup> Júnelite két áme násuk jíápsay, kaa tüisi  
aneka, itom huakajta huáatiäu jíba jo báreka.  
Ä huáatiäu jíbate johuay, entok itom éähui.  
Kaa tühuapote usiarimtaka jíápsay, jume  
huatem bénasi.

<sup>4</sup> Të Dios yore jiokolihumta yúmalasi  
jípureme, tüisi buéresi yore nákhumtayi  
Áapo itom nákkek.

<sup>5</sup> Júneli jum kaa tühuapo itom kókkolamtuk  
junne, jíapsita itom mákkak, Cristotamak  
náuhui. Áapörík tühua béchibote jínëuri.

<sup>6</sup> Dios Cristotamak itom jíabitetuak, entok két  
lóoriapo Áamak itom jóiyak, Cristo  
Jesústamaki,

<sup>7</sup> tiempo äbo huémtat machisi ä bíttebo  
báreka, juka Diosta tü eäu yúmalasi ä  
jípurëhui, juka itomak Diosta ára joähui Cristo  
Jesús-po.

<sup>8</sup> Bueituk Diosta tü eäu beyem jínëuri, enchim ä súalekä béchïbo. İri jínëuria éntok kaa enchimmet yeu simla, ál-la yúmalasi Diosta tü éäpo,

<sup>9</sup> kaa tékilta ára itom joä béchïbo. İnëli kaabe joäyi áu jábelnake.

<sup>10</sup> Áapo Dios inëli itom yáuhuak, tühuata ára itom jonákë béchïbo, Cristo Jesúspo. Dios ikäi yáalatukay, jauhuey naateka, itom áma rejtinakë béchïbo.

*Cristo kúrusit mukuka Diostau itom rúktiak*

<sup>11</sup> Huári béchïbo, áahuem huáate eme kétchi, jume kaa judíom, juka circuncisiónta mámammea yáata kaa jípureme, júnëlem téttehuaahuay. \* Të jüri circuncisión takahuat jíbapo jojohuay.

<sup>12</sup> Huámëi taahuarimmet katem Cristota jípurey; Israelta gentemmehuem mékka aaney. Entok jita Israelta mák báahuaka nokhuakapo, kaitem áma áttiakay. Jíta boobít-huäpëm kaita jípurey. İmi ániat éntok, Dios kaa enchimmak aaney.

<sup>13</sup> Të ëni Cristo Jesúspo, eme bannaataka mékka aneihuim béja Diostahuem rúktiari, Cristota ójbo béchïbo.

<sup>14</sup> Bueituk Áapo ito béchïbo yánti jíapsihuame. Jume guoy pueblom nátepua aneihui huépülsi jíba am yáuhuak. Juka sami kóräita násuk órekäuta ä tátabek; bueituk İri kara náu am antuay.

\* **2:11 2:11** İri circuncisión entok jü ili usi ou bícho bea púnta chúktirihuame.

15 Cristo kúrusit mukuka kaitasi ä yáuhuak, huame pueblom kara náu aneihui. Juka Moiséjta ley yáari kutti nésahuepo jíba tahualatukay. Bueituk jume guoyim násuk juka yoremta bemelasi yáuhuak, yánti jíapsihumta áme násuk yáaka.

16 Bueituk kúrusit mukuka Diostamak al-leehumta am mákkak, náhuichim, huépul takaahuasi am yáakari, juka náu ómtiraata kara emo bit-humta mäaka.

17 Cristo äbo yepsaka enchimieu ä nookak, juka tühua bemela noki yánti éehumta, jume kaa judíom mékka anemmehui, entok huame judíom kaa mékka anemmehui.

18 Cristota béchibotaka náhuichikam aram Dios Áchaytau kiimu, huépul Espíritu Santota böot jíba kateka.

19 Júnëli béja emëe katem nápat sékána buiärau joome, entok emëe katem entok kía naa rejtinake, kaa jóakari. Ënem béja Diosta pueblopo joome, éntokem Áapörík familiiapo jometaka áma näikiari.

20 Emëe kári johumta bénaem. Ìri kári tétam naahuak, apóstolim entok profeetam Dios huáatë bénasi. Jesucristo ínëli tua ájária, jü tétta ejkinapo órekame.

21 Ínëli jü káari tüisi náu cháataka yötusime, tiöpotu báreka, Diosta huépülsi éäpo, Cristota béchïbo.

22 Júnëli kétchi, eme áamakem yötusaka, Diosta Espíritu enchimmet ä annakë béchïbo.

### 3

#### *Jü Pablota tékil jume kaa judíommehui*

<sup>1</sup> Huári béchïbo ínapo Pablo ímïne pereeso Cristota béchïbo, eme kaa judíom juka tühuata enchimneu ín huériu bárë béchïbo.

<sup>2</sup> Jíbatua eme béja ä jikkajisula, jáchin juka Diosta áma nee yeu púalatukähui, enchim béchïbo ín mák-ri.

<sup>3</sup> Jü yore yeu machiriahuamta nee téjhuak, juka éhuil täyahuamta, bannaataka ilikkisi nee enchimneu ä jïojtekä bénasi.

<sup>4</sup> Eme juka jïojteta bíchaka ä nokätekem chë át jüneenake, jáchin machisi nee ä täyähui, juka Cristota bétana éhuil ín mák-ri.

<sup>5</sup> Íri éhuil huéeme bannaataka kat-riam yorem usiarim kaa täyatuahuakame. Të én ámeu yeu machiriahuak, jume santo apóstolimmehui entok profetammehui, ä Espíritu Santota huämi.

<sup>6</sup> Jü éhuil täyahuame ínel huéiye: bueïtuk jume kaa judíom judíommak ä áttiak, entokim ä takaapo huépülsi náu joome, entokim náu ä áttia, juka yore máknähui, Cristo Jesústa bétana, evangeliota huämi.

<sup>7</sup> Ínapone huatemmeu Diosta bétana nok íaahuaka yuktiari. Áapörík jita ára joäpo kanne ä mabetpo yúmala jïöbe; të ä úttiara páman nee ä mákkak.

<sup>8</sup> Ínapo síme jume Diosta súaleme násuk chë kaa jaichi. Kaa nee áma mabetpo yúmalatuk junne, nee ä mákkak, jume kaa judíomneu juka evangeliota ín noknakëhui, entok

juebenaara rícora kara näikiahuamta Cristotat ayukamta.

<sup>9</sup> Entok machisi nee am téjhuaanakëhui, ják áman ä huëhui. Dios simeta yáalame íkái bannaataka naateka éhuil ä jípurey, ésota bénasi; én éntok yä machiriak.

<sup>10</sup> Ínel yeu simla, simetaka jume úttiakame jum téhuekat jikat aneme ä jünerianakë béchïbo, juka yún jita täyahuamta juebenak ayukähui. Júkái béja jume Cristota sualhuäpo nau anim huam ámeu yúmatuanake, sime yäurammehui Diosta anëpo.

<sup>11</sup> Dios jíba jauhuey naateka ä yáa báreka éiyay, Cristo Jesús itom Señorpo huämi.

<sup>12</sup> Én éntokte kaa jáchin éaka áu rúktinake, jü Diostahui, Cristo Jesússta súalhuäpo.

<sup>13</sup> Huäri béchïbone én íkái enchimueu aahua: katem kóm éiya, enchim béchïbo ín guojajjahuä bétana. Ínëli eme tühuata jajamnake.

### *Jü yore nákuame chë bat huéiye jita tayahuamta béppa*

<sup>14</sup> Huäri béchïbo ínapo áu tónommia kíkthe, jü itom Señor Jesucristota Áchaybehui.

<sup>15</sup> Ímïrim áapöríkúu am nüye, jume bem téhuam sime jume náu aanim, áman téhuekapo entok ímï buíapo aneme.

<sup>16</sup> Áaporíkúu nä nétane, jíápsipo huáijhua enchim ä máknä béchïbo, símek béppa uyyorik ä jípurehui, juka úttiäraata ä Espíritu Santoy.

17 Áapo Cristo enchim jíapsimpo annake, enchim ä súalë pámani. Júnëlem Áapörikut kutti jotenake, mékka kóm nahuatulataka jum yore nákhuaöpo jíba aneka.

18 Éntokem juka Cristota yore nákeü täyanake, huatem ä súalemmaki, juka buékaata, tébiaata, mékka kómik, entok jákun tájti jikat órekähui.

19 Éntokem juka Cristota yore nákeü täyanake, bueítuk júri béja síme jita täyahuamta béppa chë bat huéiye. Huanäirem béja yúmalasi áy tápunitunake, Diostayi.

20 Áapo, úttiata jípureme símeta chë ára johua itom ä huáatiau béppa, entok itom eäu júneriäu béppa. Áapo itot ä johua, ä úttiärayi.

21 ¡Áapörik béchibotunake jú chë uýyória jum igleesiapo entok Cristo Jesúsapo jíba yúu huasuhuasuktiapo! Júnentunake.

## 4

### *Espíritu Santopo náu anhuame*

1 Ínapone pereeso, Señorta tékil ín joä béchibo. Én éntokne enchimmeu nooka: Diosta núnurim bénasem rejte, juka yörisi machik jípureka núnuhuakamta bénasi.

2 Katem emo chëhuale; al-leakem emo bitcha; emoem nák jiokolë, yánti éaka.

3 Juka enchim túlisi náu anëhuem jíba boojoria, juka yánti náu jíapsihuatma jípureka. Jú Espíritu Santo Áapo enchim anianake.

<sup>4</sup> Huépul takaahua jíbba, entok huépul Espíritu. Dios simem náu itom ä boobittua, juka itom ä mákrókaihui.

<sup>5</sup> Huépul Señor jíbba, Diosta súalhuäpo júne huépülay, entok séjtul jíba yore batöhua.

<sup>6</sup> Huépul Dios jíba aane íkäite síme áchayek. Ìri béja simem béppa káttek, simem béchibo, símekuchi entok símekuu.

<sup>7</sup> Të ítapo huépulayka ä mabet-la, juka jáchin itom ára jonakëhui; Cristota itom ä mák bárë pámantä mabetak.

<sup>8</sup> Huäri béchibo jü jïojteri ínel jiaahua: Téhuekau jikau am núk siika, jume pereesom; juka kaa jiöbeka ára jita johuamta yoremem am mákkak.

<sup>9</sup> ¿Jü áman “jikau sika” ti jíame, jáchisu júntuk jiau báare? Bueítuk jum mékka kóm buíau bat kóm siika ti jiau báare.

<sup>10</sup> Huä kóm sikame éntok, ìri két jikau siika, síme téhuekam béppa, símeta tápunia báreka.

<sup>11</sup> Entok Áapo két apóstolim jóiyak; huate éntok, profetam; huate éntok, evangelistam; huate éntok, pastoorim, entok jume yore majtíame,

<sup>12</sup> jume Cristota súaleme yúmalasi bem yötunakë béchibo. Kaita ámeu bëyekam Diosta tékil jonake, juka Cristota takaahua jikau yöturia béchibo,

<sup>13</sup> simem itom áman yumäu tájti, jum huépülsi Diostat éehuäpo, entok jü Diosta Üusi täyahuäpo, jáchin juka yoremta yúmalasi áu

jípurèhui, Cristota yúmalasi yötulataka áa beu áu jípureka.

<sup>14</sup> Katte nápat ili usim bénasi itom huériu báahuäu bíchaa náa kannake, jeka doctriinayi, jume yoremem yore bätäuta jípureka, lütüriata síme bem úttiabeyim ä huéria, jum yore náyotehuaka yore bätäuta jípureka.

<sup>15</sup> Täte juka lütüriata jíba boojorianake, yore nákhuaamtamak ä huériaka. Símekuute yötunake, huäri kóbatau chäkari; ïri Áapo Cristo.

<sup>16</sup> Jü síme takaa náu cháaka, ótam tottëpo, nánancham emo ania, jáchin ótam náu chäka tekipanua bárë pámani, yötuhuaanta mabetaka, emo nákuäpo yötuka.

### *Jü Cristotat bemela jíapsi*

<sup>17</sup> Íkäine két enchimneu nooka, entokne Cristota téhuampo enchimneu ä aahua: Katem éntok jume kaa judíom bénasi rejti báare. Ímëri béja bem éäpo jíba kat báare.

<sup>18</sup> Bem kóba súahuäpom kaa machiriak. Diosta täyahuamtahuim mékka aane, kaita bem täya béchïbo, entok námakak bem jíäpsekä béchïbo.

<sup>19</sup> Ímëi béjja, juka bem jíapsi námakasi joaka naateka, jum kaa türikuuhuim emo tójjak, síme juka chïcha machik jo báreka, kaa emo yüeka.

<sup>20</sup> Të Cristotat katem junëli ä täyak,

<sup>21</sup> eme lütüriapo ä jíkkajj-latuko, juka Áapörik bétana yore majtiahuaanta, juka lütüriata Jesústat ayukähui.

22 Juka bannaataka enchim jiapsäu éntok, emoem ä úhua, bueituk huäri ínëli jíapsihuame yorem öraata kaa tü éä bënna. Ìri éntok kaa türikuu joyhualataka áu bätäulataka jíápsa.

23 Juka enchim éäu espíritupem bemelasi yáuhua.

24 Dios éehuápem bemelak emo sánkotua, Diosta lútula éä pámani, Dios éehuäpo huépülsi emo nüyeka, lütüriata huë pámani.

25 Huäri béchïbo, juka aranókïchiatem tójaka, lütüriata jíbem nooka, enchim bënasi yorememmaki, bueituk simetakate huéput takaahuapo náu joome.

26 Öomtekätek junne, katem kaa türik yáa báare. Katem täata áman huéchëu tájti omti báare.

27 Katem diablota enchim jíápsipo kíkkibaktua.

28 Huä ékbuaïhui kaa éntok ékbuanake, ál-la tekipuananake, túhuata mámammea joaka, jita jípureka juka jiokot éamta aniä béchïbo.

29 Kaita noki chïcha machika enchim tempo yeu huéenake, hua türika jíbba, entok huaka tüisi huéchemtem jíba téhuaanake. Bueituk jábetau bëyemta túhuay yötunake, entok ä jíkkajame Diosta túhua mabetnake.

30 Katem juka Diosta Espiritu Santota siroktua, íayïrem sellota bënasi ä mák-ri, enchim jínëuri taahuari béchïbo.

31 Juka enchim jíapsipem chibu éehuamta emo úhua, ómtiraata, kujti éehuamta,

chayhuamta entok jábetat béttesi nokhuamta, entok síme kaa tü éehuamta.

<sup>32</sup> Ál-lem emo nákeka náu aane, emo nák jiokoleka. Jíta nat innéatek junne, emoem jiokore, Diosta enchim jiokoreká bénasi, Cristotat éehuäpo.

## 5

### *Machiriapo usiarim bénasem rejte*

<sup>1</sup> Eme nákhuame Diosta usiarim, enchim Dios Áchayta bénasem emo nüye.

<sup>2</sup> Emo nákhuäpo jíbem rejte, Cristota itom nákekä bénasi. Áapo itom nákeka áu tójjak, ito béchïbo. Juka Diostau bíchaa náikiari áu óorek, entok jiokot aneka mëhuaka musäla jubasi Diostau jikau yuumak.

<sup>3</sup> Të jume kaa emo jubeka náu anhuame entok síme jita chïcha machira ö üttesi tomit kopteme, kaa enchim násuk téhuaapo yúmala, ál-la Diosta súaleme emo nüyë bénasi jíbba.

<sup>4</sup> Juka nokta kaa náu bátasi huémta katem ä nooka, juka kaa suamsi emo nühuamta junne. Juénasi nokhuamta, katem ä nokpo yúmala; ál-lem Diosta baysahueka aane.

<sup>5</sup> Bueitukem béja íkái jüneria, jü kaa emo jubeka náu jiápsame, ö chïcha machik jiápsekame, ö üttesi tómit kopteme tattäbui díosim súalhuäpo bénna. Kaita áman áttianake, jum Cristota entok Diosta reytaka am nésahuëpo.

<sup>6</sup> Kaabe enchim bätäunake, kia jájana nokaka, bueituk íari béchïbo jü Diosta omtëhui

áme béppa kóm sisime, huame usiarim Diosta nésahui kaa jo báareme béppa.

<sup>7</sup> Katem bem joäu ámemak jo báare.

<sup>8</sup> Bueitukem bannaataka kaa machiku rejtey; én éntokem Señorpo machiriam; machiria usiarim bénasem rejte.

<sup>9</sup> Bueituk jü Espíritu machiriapo ímëi taakak: juka tü jíapsihuaamta, juka lútula huémta, entok lutüriata.

<sup>10</sup> Juka Señorta türëuhuem yúmalasi át jünéaka ä johua.

<sup>11</sup> Entok juka kaa machiku bem joähui, katem ámemak ä johua; al-lem kuttílasi ámeu nokaka yeu am buísse.

<sup>12</sup> Bueituk jü éhuil tiusi machika bem joäu katchan át nokpo yúmala.

<sup>13</sup> Të sime yeu buíjhuakatek, jü machiriata béchibotaka yeu boböte, sime jita yeu buíjtaka ják ayukame. Bueituk jü machiria simeta yeu buíbuise.

<sup>14</sup> Huäri béchibo ínel jiaahua:

Búsäe empo kócheme,  
éntoke kókkolam násuk yejte.

Huanäi Cristo enchi machirianake.

<sup>15</sup> Át suakem ä bitcha, jáchin enchim rejtëhui, kaa huame kaa susuakame bénasi, ál-la suaka jüneame bénasi.

<sup>16</sup> Juka tiempota ímë ayukamta katem kíal ä simtua, bueituk jume taahuarim itom ámet jíapsáhuim katim türi.

<sup>17</sup> Katem kia rokosi emo nüye; ál-lem át suuhua, juka jita Señorta huáatiähui.

18 Katem vinota jëye, áy naako báreka, bueítuk jájana anhuäu bíchaa enchim huériunake; ál-lem Diosta Espírituy tápun báreka éiya.

19 Buikim jíapsipo yeu huéeme, himnom entok salmomem náu ejtejhua. Inëlem buiika, Señorta úttileka enchim jíapsimpo.

20 Jíbem símeku ä baysauhue juka Dios Áchayta, itom Señor Jesucristota téhuampo.

*Nánabeu éehuäpem nánancha bétuk emo jípure*

21 Nánabeu éehuäpem nánancha bétuk emo jípure, Diosta yörihuäpo.

22 Jume kunakame bem kunam bétukim jíapsinake, Señorta bétuk bem jíapsä bénasi.

23 Bueítuk jü kunahuari ä jubiabeu kóba yöhue, Cristota jume Cristota سوالhuäpo nau animmeu kóba yöhuetukä bénasi. Jume Cristota سوالhuäpo nau anim éntok Cristota takaahua; áapo éntok ä jínëula.

24 Jáchin jume Cristota سوالhuäpo nau anim Cristota bétuk emo nüyë bénasi, ánëli kétchi jume kunakame bem kuna bétukim emo núnake, símeku.

25 Kunahuarim enchim jubimem nákke, Cristota ä Cristota سوالhuäpo nau anim iglesia nákkë bénasi. Entok ä jíapsihua áa béchíbo tójjak,

26 huépulta bénasi ä tahuaria báreka, yúmalasi ä basuaka, ä nokiy báampo ä báksiaka.

27 Áapo áa béchïbo ä bíttebo báare, juka igleesiata, símek béppa uyyorik, kaa chïcha maachik entok kaa choorik, huépülsi áu jípuremta, kaa chïcha maachik.

28 Júnëli kétchi jume kunahuarim bem jubiamim nákpö yúmala, bem takaahuam bem ériä bénasi. Ä jubiahua nákeme áapo két áu nákke.

29 Jauhuey júne kaabe ä takaahua muksi eriaka jíápsa, ál-la ä jíbuätuanake entok ä suayanake, Cristota ä igleesiahua ä suayaka símeta ä máká bénasi.

30 Bueítuk ä takaahuapote áamak aane, ä óta huakajmaki.

31 “Íäri béchïbo jú yoreme ä áchayhua entok ä áyehua tö simnake. Huanäi béja ä jubiaheu ruktinake. Inëlim huépülak náu takaanake, jume guoyika.”

32 Buéresi maachi, íri éсотaka bénasi täyahuame, të ínapo én enchimmeu ínel jíaahua, Cristo entok igleesiata bétana nokaka.

33 Huäri béchïbo, hueepulayka ä jubi náknake, enchim emo ériä bénasi; jú jámut éntok ä kuna yörinake.

## 6

1 Eme usiarim, Señorta nésaupo enchim áchayem nok jíkkaja, bueítuk íri tua lütüria.

2 Em áchay entok em áiye, Akë am yöre: “Íri kësam nésehui tühuata itou nüpame,

3 tüisi emou ä huéenakë béchïbo, éntoke büru huásuktiriam jípunake, ími buíapo.”

<sup>4</sup> Eme áchayhuarim, katem enchim üusim omtitua, ál-lem tülisi am yöturia, kuttílasi ámeu nokaka, Señorta nésaupo.

<sup>5</sup> Eme sáyhuaka tekipanuame ímĩ buíapo enchim tekodem yöreka am nok jíkkaja, chíkti enchim jíapsimmaki, Cristota nésau johuäpo bénasi.

<sup>6</sup> Katem bem bíchäpo jíba emo bamijtuaka tekipanua, yoremem bíchäpo tüisi tahua báareme bénasi; të ál-la Cristota nésau joame bénasi, chíkti enchim jíapsimak Diosta huáatiäu joaka.

<sup>7</sup> Al-leakem tekipanua, Señortau tekipanuamta bénasi, kaa yorememmehui.

<sup>8</sup> Jünëaem, jü tühuata yáakame Señorta bétana béjtuatunake, jábetaka junne cháka ö búttiataka tekipanuame.

<sup>9</sup> Eme éntok, tekohuarim, ánëli bénasi ámema emo huériunake, katem am guomguomtiaka am máujtuanake. Jüneäem jü Señor téhukau káttek, bem Señor entok enchim Señor. Áapo kaabem yeu púuhua; símem nánancha nákke.

### *Espíritupo nássuahuame*

<sup>10</sup> Eme éntok, ín hermaanon, Señortamakem kutti emo buísse, ä úttiärat éaka.

<sup>11</sup> Akem ä sánkote, síme juka áy nássua béchíbo juka Diosta yore mákähui. Huanärem kutti jáptenake, juka diablota jita bénak enchimmeu huéetuay junne.

<sup>12</sup> Bueítuk katte huakajta entok ójbota béj-reka nássua; ál-la jume diablota ángelesim ímĩ ániapo kaa türik jita sáhueme, úttiära

jekapo rejteme, kaa machiriapo nésahueme, kaa türik joame, ángelesim juebénakari entok jikat aneme.

<sup>13</sup> Huäri béchibem ä nüye, juka áy nássua béchibo, Diosta yore mákähui. Huanärem béja yölataka áma yeu kannake, simeta tüisi yáasulataka kutti jäbueka.

<sup>14</sup> Óusem jäbue, joot lütüriata súmalataka, sisiguokta jípureme yómpaka, lútula jíapsihumta sánkoka,

<sup>15</sup> éntokem juka bemela tü nokta bochaka kannake; jüri béja yánti jíapsihumta huériame.

<sup>16</sup> Juka escuudota éntokem nüye, jüri jü Diosta súalhuame; huáyirem ä tuchanake, juka táijta diablota enchimieu jímmaanakhui.

<sup>17</sup> Éntokem juka sisiguok möbeta kóbat enchimmet yétcha; jüri béja Diosta itom jínëuläu nätua. Entok jume Espiritu Santota ejparam; jümëi béja jü Diosta nooki.

<sup>18</sup> Kaa chúktekem Diostau nooka. Símekem áu buaana, éntokem Espiritupo áu ä nétane. Katem kópteka emo suaya. Síme jume santom béchibem Diostau nooka.

<sup>19</sup> Ino béchibo kétchi; eläposune juka tenta ín étapo bélékisi nokta jípunake. Juka tü nokta bemelasi huémta éhuil kaa täyahumta am jüneetuanake, óusi éaka.

<sup>20</sup> Júkai jo béchibone ímí aane; téhueka bétana nokta máktaka ä jípureka ä huiutia, karenampo pereesotaka. Diostahuem nee buania. Eläposune óusi éaka Cristota bétana noknake, huéchiapo áman jíbba.

*Ä chúpëpo teboteri*

<sup>21</sup> Bueituk ino bétana sìmëta enchim jünerianakë béchïbo, ín joähui, júkäi enchim jüneetuanake jü Tíquico, hermano tüisi nákhüame entok chíkti ä jíapsimak Señorta tékilpo aneme.

<sup>22</sup> Huäri béchïbone enchimneu ä bíttuak, jáchin itom anëu enchim jünerianakë béchïbo, entok al-leaka enchim jíapsi jóotenakë béchïbo.

<sup>23</sup> Yánti jíapsihuame jume hermanom béchïbotunake, entok jü yore nákhüame, entok jü Diosta súalhuame, Dios Áchayta bétana entok Señor Jesucristota bétana.

<sup>24</sup> Jü Diosta tü eäu sime jume Señor Jesucristota nákemaktunake, jü yore nákhüame kaa lülüteme. Júnentunake.

## **Mayo**

### **Mayo: Diosta nooki yorem nokpo New Testament**

copyright © 2014 Wycliffe Bible Translators, Inc.

Language: Mayo

Contributor: Wycliffe Bible Translators, Inc.

All rights reserved.

2025-05-13

---

PDF generated using Haiola and XeLaTeX on 11 Jun 2026 from source  
files dated 13 May 2025

84020f7b-8f34-5f65-803f-a2c6c92b92ea